

Milli privels e bleras vias per ascender il Diupathan

Fabian Lenk fa decider il lectur sin tge ruta ch'el vul dumagnar la muntogna privlusa

■ En «La muntogna dals 1000 privels», in cudesch per giuvens aventuriers e giuvnas aventurieras a partir da 10 onns, sa chatta il lectur en la rolla da l'alpinist giagliard che vul ascender la muntogna Diupathan, in spelm gigantic da passa 6000 meters. Privels da la natira sco il vent, la naiv ed in fraid mudent spetgan tgi che prenda la via grippusa sut ils pes, e be pac turnan sauns e salv da l'expediziun privlusa. Il success dependa dal lectur u da la lectura che sto sa decider per la dretga via en situaziuns delicatas.




«Plain respect guardas ti ensi vers la muntogna Diupathan. Taissa, fraida e smaladi auta. 6890 meters per esser exact. Sia piramida da piz imposanta è cuverta da naiv e glatsch. Ti sas che la temperatura è sium per la gronda part var 25 grads minus. Ti sas era ch'i dat vents si là

che tschivlan cun ina sveltezza da passa 150 kilometers. Il vent chatscha fins cristals da glatsch sco pitschens projectils tras l'aria. Mintga terz alpinist che ha vuli ascender il Diupathan è mort. Els èn dads giu dal fil, crudads en sfessas da glatscher, schelads en la tempesta u simplamain sparids senza fastizs.

Gea, il Diupathan na lascha betg vegnir datiers ils umans. Ma gist per quest motiv es ti qua. Ti vegns a dumagnar il Diupathan. Qua na datti nagin dubi per tai. Stinadamain das ti il chau en la direzziun dal gigant refusant. En tia vita giuvna has ti gia dumagnà varsaquants da 6000. Ma il Diupathan è insatge auter. El vala sco in dals pli difficils da sismilli. Quai ha provocà tia ambiziun. Ti vegns considerà sco grond talent alpinistic. Il davos temp han las medias adina puspè relatà da tai. Ma era sche ti vegns a ristgar l'ascensiun en il team – insacura vegn il mument, en il qual ti es sulet. Cun tai, cun la muntogna smaladada, cun tia standad totala e cun tia tema che sa serra enturn tes cor sco in pugn fraid da glatsch. Alura vegn il mument che decida, tgi che triumfescha sur da l'auter: la muntogna sur da tai u il cuntrari.»

Uchia cumenza l'istorgia d'aventura da l'autur tudestg Fabian Lenk, che è cumparida l'onn 2007 er en rumantsch.



Cuverta dal cudesch «La muntogna dals 1000 privels».

Il lectur-alpinist arriva en in pajais fictiv, che è enconuscent per sia muntogna strusch dumagnabla, e sa prepara per la lunga ascensiun. La lectura è plain surpraisas: a la fin da bunamain mintga pagina ston ins prender ina decisiun e sa decider per ina u per l'autra via. Èsi pli precaut da spetgar anc in di fin che l'aura vegn meglra u perd'ins uschia massa bler temp? Pon ins sa fidar dals indigens e dals guides da muntogna u fasschess ins meglia dad ascender la muntogna sulet e d'atna iniziativa? Betg adina è la via presumptivamain pli segira era quella cha maina enavant. A la fin finala datti be paucas vias che mainan propi al piz da la muntogna ed er puspè enavos. Las pli bleras da las 44 vias èn vias tschorvas che mainan u enavos a l'eroport u directamain en precipizis e sfendaglias. Segui in pèr da questas vias e decidai a mintga cruschada (grafica a sanestra)!

Sin vias spinusas fin al champ da basa

L'emprima decisiun ston ins prender gia curt suenter l'entschatta da l'aventura: Cun l'unica finamira d'ascender il Diupathan avant ils eglgs prend'ins in bus en direzziun dal champ da basa, nua ch'ins vegn a scuntrar ils auters commembers da team. Suenten avair spetgà ditg aud'ins finalmain la canera d'in grev motor. In bus totalmain surchargià arriva. Cun il satgados sa smatg'ins en in chantun sper il manischnunz. Ruc a ruc sa metta il bus en moviment. Plaunsieu sa stauscha el sin la via che maina al champ da basa. Tras il bus stgadaina la musica dal radio. Il manischnunz sbragia il refrain a tut pudair. Tge entschatta da viadi! Il bus sa runa cun stentas sin las vias spundivas: terz gir, segund gir, emprim gir. Alura rodla el sur il crest e da l'autra vart engiu vegnind adina pli svel. En gronda hectica trai il manischnunz il frain - ma nagina reacziun! «Ils frains èn defects!» cloma'l. «Sche vus vulais salvar la vita, stuais siglir dal bus!» Ils emprims passagiers siglian or en il liber tras la porta dal bus e crodan en in aual da muntogna che curra gist sper la via. I na resta temp da ponderar ditg; tge duain ins far, siglir u betg?

Tgi che ha prendi la dretga decisiun po cuntinuar ses viadi en direzziun dal champ da basa. Ma er en zonas betg anc

alpinas pon ins facilmain vegnir giud via. Co duain ins per exempel sa cumportar sch'ins inscuntra indigens? Tut tenor decisiun sa chatt'ins a baterlar cun in um giuven en sia chamonia da chatscha. L'um relata istorgias veglias da la cuntrada muntagnarda enturn il Diupathan. En tut sias istorgias giogan ils dieus indigens ina rolla impurtanta. Alura envida il nov ami in pèr chandailas davant in pitschen altar e fa in té. «Quai è in té spezial cun il qual ins vegn fitg datiers dals Dieus. Vuls ti era baiver in cuppin?»

In'autra via maina il lectur en in pitschen vitg plain vita. Ils abitants vivan da la cultivaziun dad ers e da la tratga da muvel, ma surtut dals turists da trekking e da rampagnar. In um che ri amiaivlamain pretendia en sia pitschna butia per in film da fotografar il tschintgdubel dal pretsch normal, e sin la via pledenta in divinader. El studegia las lingias dal maun da l'alpinist ed admonescha lura d'ascender il Diupathan: «Là ta spetga in grond privel!» Tge duain ins far, tadlar e smetter ils plans u tuttina ascender la muntogna?

Ascender la muntogna sulet u en gruppa?

Tgi che chatta la via fin al champ da basa senza dar giu d'ina spunda è spert confruntà cun novas sfidas. Sch'ins arriva memia tard, è la truppa magari gia partida ed i na resta auter che ascender la muntogna sulet. Ils emprims tschintgtschient meters d'auitezza èn da dumagnar senza problems. Ma baud cuntansch'ins il glatscher cun sias sfessas perfidas. Per fortuna èn vegnidas messas stgalas d'aluminium sur las sfessas las pli privlusas, per ch'als alpinists possian ballantschar suravi. Disfortunadamain ha la radiazion intensiva dal sulegl luente liber in bun toc ils crutschs da glatsch, cun ils quals las fins da la stgala èn segi-

radas. Tgi sa, sche la stgala tegna anc il pais dal proxim alpinist? Puspè ston ins decider sch'ins duaja ristgar da passar sin la stgala u spetgar fin ch'il sulegl è davent e forsà perder duas uras che pon anc esser impurtantas.

Er en in team n'è l'ascensiun d'ina muntogna betg adina simpla. Quai vegn ins svel a constatar. Leo e Tom èn guides da muntogna cun caracter tut different: entant che l'emprim è temerari e ristga d'ascender il Diupathan er da malaura è l'auter precaut. Ma Tom para da taschenttar insatge: spetgond che l'aura vegnia meglra e ch'ins possia finalmain partir per il piz fa l'alpinist-lectur in pèr pass enturn las tendas en il champ da basa. Casualmain va'l en direzziun da la tenda dal guid, nua ch'el auda vuschs agitadas. Tge èsi? Sch'el giess anc pli datiers, pudes el forsà chapir da tge ch'ins discurre. Tge far: guntgir la tenda ni spiar?

Fin tragica u grond success

Er sch'i para mintgatant d'esser in'interpresa impussibla, tgi che prenda las dretgas decisiuns en il dretg mument, agescha precaut e curaschus e sa mussa loial, vegn a dumagnar ils passa 6000 meters fin al piz. Ils auters spetga in destin different e savens ina fin tragica en ina burasca da naiv u en ina sfessa infinita dal glatscher. Ils bliers ston acceptar che la muntogna als ha suttamess e sa retrair. E quels ch'èn resistents avunda ston chapir ch'ins n'è nagliur segir da malfactors, er betg en auta muntogna. Ils stgazes e misteris dal Diupathan n'attiran numnadamain betg mo ils alpinists... Tgi che scuvra dentant sez in da quels misteris, ha la schanza da survegnir renum mundial. Damai, tge far sch'ins chatta in amulet antic paucs meters sut il piz, al salvar u simplamain laschar là e perder forsà la schanza da vegnir enconuscent?

In pitschen glossari per alpinists

«La muntogna dals 1000 privels» n'è betg mo in cudesch d'aventura captivant per giuvens e giuvnas, tras la lectura vegn ins a savair er bliers detagls davart l'alpinissem ed ins emprenda a conuscher in entir vocabulari tecnic:

bivac	champ or en il liber, savens be cun in satg da durmir (= satg da bivac)
bova	crudada da blera crappa / d'in grond toc da crappa
burasca da naiv	navaglia cun in vent ferm
champ da basa	l'emprim champ stabel sin la ruta vers il piz da la muntogna
chapellina	chapè che protegia l'alpinist / l'alpinista
chappellas	agid per chaminar sur la naiv ed il glatsch
glatscher	massa da naiv cun sfessas; vadretg
lavina	gronda massa da naiv u glera che glischna u rodla aval
mal d'auitezza	malsogna ch'ins po survegnir en grondas auitezzas
primascensiun	l'emprima ascensiun d'ina muntogna
satgados	bulscha
serac	toc d'in glatscher rut giu; lieu nua ch'in toc da glatscher è rut giu
sfendaglia, sfessa	foras profundas en il glatscher che pon s'avrir nunspegtadamain
sherpa	pievel dal Himalaia; duvrà sco sinonim per ils purtaders da bagascha en muntogna
squadra da suga	gruppa francada vi da la medema suga; team
stempirà	malaura
tschinta da raiver	tschinta per sa francar vi da la suga
tschorventada da la naiv	malsogna ch'ins survegn sch'ins na protegia betg ils eglgs en lieus cun gronda radiazion dal sulegl (p. ex. sin glatschers u sin in plaun cuvert da naiv)
zappunet	zappun che gida a far stgalims en il glatsch

La presentaziun:
Fabian Lenk. La muntogna dals 1000 privels. Cuiira 2007.

Dapli infurmaziuns:
chatta.ch/?hiid=363
www.chatta.ch



Tgi che vul ascender il Diupathan sto prender bleras decisiuns, ma be pacas mainan al piz.



Ascensiun sur naiv e glatschers vers il piz.